



清聖門通考序



嘗謂仲尼之道與天地並凡生

民皆為

安居粒食無他蓄患者疇非聖人按
持力哉此統紀之昭垂即于萬禩猶一
日也第莊列者流罔衷於道惟徇於
異往之援新奇秘怪以張大其說而聖
人之道始晦暨子長氏作為史記乃躋孔
子於世家次門人於列傳以故考聖者有

所折衷顧其微辭懿行者散見他帙者
亦多脫漏未盡自漢迄今未有能會
而通之者余從叔少東先生歷官郟魯
周禮洙泗闢里之間慨然興思收闡其幽
而補其逸旁搜逖覽垂二十載許始克
成編先之以年譜繼之以聖系繼之以聖
蹟又繼之以諸弟子凡十有二卷命之曰
聖門通考今即其書而續之可謂詳

且核矣未幾致以東歸抱疴屢歲尚存
未竟之意余小子不揣固陋僭為續貂
以為苗裔弗纂則鳳毛麟角之英不顯
林廟弗備則安靈藏玉之地尚湮謚
祀弗紀則崇德報功之典不著於是
妄以己意增其門類足成三卷通前
書若干卷非敢冒添足之譏亦以完先
生欲為之志也嗟乎考其前編可以見

聖人之發源也偉而深考其續編可以
見聖人之垂澤也大而遠雖於仲尼
高厚之德無所裨益而學者有得
于是亦未必非高山仰止之一助云
萬曆十五年歲在丁亥三月上澣吉
四明後學包廬序



續具門通考卷之一

四明後學包廬編輯

林廟

叙曰昔鄭子產稱人魂魄強是以精爽神明况聖人
乎始化曰魄致死之藏林焉鬼道也魄陽曰魂致生
之萃廟焉神道也神通於天鬼歸於土詩稱文王在
帝左右其孔子元神之謂乎元氣嗟吸終始相旋聖
人元神與天並運世歷千古氣無存亡升天降原洋洋
昭格詩云神之格思余格林廟思聖人之神常在也

孔林

叙曰古者塋不封樹後世墓塋封樹始此矣然未有以林稱者稱之自孔子始語稱太山之下水交流孔林正茂豈非諸弟子各持異種蕃植塚上遂以林稱乎王侯曰陵士庶曰墓尼父獨曰林表聖德也負太嶽拱鄒嶧橫亘洙泗環以森岑林木誠天下古今風氣攸萃之冥府也然鳥雀不巢荆茨不生匪直地靈良由神造聖德通天地馴鳥獸貴草木與元運相轉旋矣

孔子墓去魯城北一里塚塋百畝南北廣十步東西十

三步一云三高一丈三尺今增五十餘步高一丈五

尺塋中不生荆棘及刺人草木無鳥雀巢其中塋樹

以百數皆異種魯人世世無能名者民傳言遠方弟

子各持鄉土異種來植於塚皇覽載其樹多柰粉雜

離女真五味堯檀之屬伍輯之從征記曰夫子墓二

今根猶存諸弟子於塚前以瓴甃為壇壇高六尺與地平

後漢魯相韓叔節易之以石石厚三尺許方亦如之

縱橫各七其數四十有九或當時弟子為壇時壇前

夾路石表二石獸四石人二獸作仰號之狀神門一

間齋廳三間在宣聖廟東南春秋為族衆餼神惠之

所

伯魚墓在先聖墓東少南相去僅數步

世傳太山之下水交流孔林正茂蓋孔子葬鯉卜其宅兆后孔子没公西華等掌其識莖莖孔子於此今世稱為孔林云

子思墓在先聖墓南少東相去十數步蓋商人尚右故也或傳商人莖

法抱子懷孫故其制如此

宋建炎二年有金人犯闕里有喧言發孔子墓者粘罕問通事高歷商曰孔子何人對曰孔子大聖人粘罕曰大聖人墓焉可發皆殺之後建炎三年金睿宗駐兗州登杏壇奠拜復詣聖林遣軍士有發泗水侯墓者方深六尺餘命執縛十二人至廟十里外殺之

宋文帝元嘉十九年詔蠲路側數戶以掌灑掃魯郡上

民孔景等五戶居近墓側蠲其課役以給洒掃詔種栢六百株

後魏孝文帝延興二年給十戶以充洒掃

唐睿宗太極元年以兗州隆道公祠戶二十供洒掃

玄宗開元十三年東封回幸孔子宅給復近墓五戶

憲宗元和十三年復置洒掃五十戶

懿宗咸通四年給灑掃陵廟五十戶

後周太祖廣順二年幸林廟以廟側數十家為洒掃戶

及勅兗州修葺祠廟禁孔林樵采

宋真宗景德四年詔兗州舊以七戶守墳宜增置五十

戶

大中祥符元年東封回幸林廟給近便十戶以奉瑩
域月朔謁文宣王廟內外量設黃麾仗襲封文宣公
親伯叔兄弟並許陪位

仁宗寶元元年以孔勗任秘書監主管林廟自後孔氏
任鄉官者皆以主管林廟係銜

哲宗元祐元年勅差洒掃戶五十人看林戶五人

孔宗翰請增林戶狀曰夫子墳林今一千六百餘生
喬木参天近年多為盜賊斫伐州縣既不留意看林
戶又以減省識者傷嗟方當朝廷全盛之時鄒魯聖
師之地哀歌如此臣昔在慶曆中曾記一事梁適知
兖州日乞以廂兵代廟戶又裁減人數方是時宰相
章得象欲如其請參知政事范仲淹獨曰此事與尋

常利害不同自是朝廷崇奉聖師美事仁義可息則
此人數可減吾輩雖行他人必復之朝論遂已當時
天下以此賢仲淹而鄙得
象疏入哲宗遂詔如舊

皇明洪武二年洒掃人戶合依漢唐宋制設一百戶

聖林古蹟

先聖墓北有虞墓五間皆石為之先聖沒戒門弟子為
虞墓後果遭秦始皇發冢有白兔出於中始皇逐之
至曲阜西十八里溝而沒魯人因名其溝曰白兔溝

楊奐東遊記曰入孔林徘徊思聖堂之上由輦路而
北東連泗水侯伯魚墓南連沂國公子思墓世家云
相去十步耳而密邇若此疑後人增築之也然規制
甚小禮之所謂馬鬣而封者是也子思之西石壇居
攝元年二月造有日上谷府鄉者有曰祝其鄉者先
聖墓西北白兔溝也二石獸狀甚恠林廣十餘里無

荆棘無鳥巢將吾道終不可
蕪沒而鳳鳥有時而至與

瑩中楷木獨多縱橫有文為世所珍

廣志云夫子沒弟子各持其鄉土所宜木入植一本於墓而去塚上獨多楷木出海南今林中最多間有因風摧折者士夫得之以為手杖

子貢手植楷木枯幹叅天若干丈至今猶存有小石碑
在享殿後階東

孔克堅楷杖銘曰孔父檜端木楷合為杖世竒才干
七百年永哉君子將壽與偕

孫晟銘曰泰山鍾英孔林孕秀扶我斯文而康而壽
宋景濂銘客有遺予孔林楷木杖者橫銘曰托根兮
文如蛇腹節節可觀刻斯銘

孔林有文橫橫兮如玉如金千載寂寥兮孰白爾扶
持之心

又銘曰生孔林承聖澤文庚庚光繹繹扶顛持危資
爾德

子貢廬於塚上凡六年史記廬墓塲在先聖墓前東向嘉
靖初陳鳳梧重修堅緻朴古足以持久

太史公曰弟子及魯人往從塚上而家者百有餘室
因命曰孔里魯世世相傳以歲時奉祠孔子塚而諸

儒亦講禮鄉飲大射於孔子塚孔子塚大一頃
魯相韓勅字叔節修墓碑略云皇漢帝永壽三年青龍建

酉孟秋之旬

布天德帝拜大臣曾曾玄玄魯相河

南京韓君惟

磨滅六字

孔聖素王受象乾坤至於周衝吳

文德恭耀

以下磨滅不可讀

孔弘幹曰古碑在先聖墓前東偏伯魚墓西兩墓間南向立不知何時仆矣先聖六十一代孫弘幹與古印本祖庭廣記相對僅得如錄宋歐陽公深好古刻集古錄林厠漢碑皆有跋此碑獨無蓋仆久無傳矣

輦路宋真宗幸孔林以林木擁道降輿乘馬至先聖墳

釋奠再拜今自林前石橋直趨駐蹕亭有輦路皆輦

以石

駐蹕亭宋真宗東封回駕幸闕里顧問先聖墓何在子

孫道引鑿輿躬自聖林奠謁坐於饗殿上宣兩府及

兩制賜茶此亭有石碑字多残缺帝詣亭中命詞臣

拂辭辨認盤桓久之故名駐蹕云

在先聖墳東伯魚子思兩墓之間

時王欽若言祭文宣王詣墳致奠得芝五本詔遣楊

懷玉祭謝復得芝五本

石像先聖墓舊無石像宋宣和五年有司請於朝命工

鑄造雖已刻成委仆於墳林外污泥中通判襲慶府

王衣衍聖公孔端友等與厠宅族人揆日卜地峙立

於宣聖墳前寔惟奉朝廷尊師重道之意也時宋宣

和五年十月初三日

墓前舊之一世祖二世祖三世祖小石碑至元二年總

管張仲仁易以大石碑石鼎外製石門今石門已廢
惟餘石甃崇基

防山

啟聖公叔梁紇墓

啟聖公夫人顏氏墓

孔弘幹防山跋畧曰防山在孔廟東三十里周圍八
里高二里直山之北三里餘乃聖考啟聖公墓在焉
聖祖生三歲而啟聖卒葬於防山先聖祖母顏氏逝
殯於五父之衢鄒人輓父之母告聖祖父墓所在遂
合葬於防今土人皆稱為梁公林者是也聖兄伯尼

家語云孟皮或作伯皮亦作伯尼者蓋本聖祖為仲
尼也墓在聖考墓東南三步許后土碑在聖考墓東
北十餘步饗殿直聖考墓前遺址存焉林北曲阜泗
水通衢道北穹窿一碑大鐫啟聖王墓林之東為脅
溝山潦直犯是林至元二年甃以石隄壁立數仞永
障水患每歲清明日及十月初二日子孫祭掃焉

楊奐東遊入防山林曰達魯溝村拜聖考齊國公墓
林廣四十畝墓前石刻五十一世孫元楷立石溝水
在林之東北入於泗其南防山也山之峯東西
有五禮云合葬於防是也林之北東蒙路也

伯皮墓在啟聖公墓東南三步許

顏林

叙曰今觀於楊王孫之事薄矣蓋矯之過者非禮也
門人葬顏子厚矣而恩勝於義亦非禮也蓋自葬以
薄猶不戾於人情葬師非厚則無以致情盡禮殆處
之以楊王孫之事人其謂我何是故孔子葬鯉以義
勝於恩遠矣門人葬顏子以恩勝於義遠矣然防山
之陽葬曰顏林泗水之濱葬曰孔林魯人不忍斥言
岡隴者若不忍聞其死然也嗟乎召伯性矣南國歌
棠以誦德遺愛在於棠也孔顏沒矣魯人稱林以表
德遺哀在於林也二林相望三立不朽雖與天網地
維並存可也

顏子墓在魯城東二里防山之陽有顏林石刻曰先師
充國公之墓前一石鐫兩甲士背負而坐一執斧一
執金吾又一碑湮沒不存惟坐跌在墓高丈餘林木
森鬱其地廣袤各一百五十尋有五尺少東村曰上
宋有祀田六十畝歲收其租以奉時祭

祀國公顏路墓

國夫人姜氏墓同祀國公合葬魯防山陽

古楠

任昉述異記曲阜古城顏林墓上古楠二株
可四十圍土人云顏子手植之木今不存

侍郎林

附顏氏自晉唐以來為黃門中書門下侍郎
及部侍郎者前後凡一十主人故世稱顏

侍郎林

在魯城東北隅西至陋巷祖庭三里餘南
鄰官道即今族屬皆葬此林其地周圍二里餘

叙曰天下之物置諸安則安置諸危則危人之置其身也亦然曾子臨深履薄將斃而易箚可謂置身於安矣玄寨東麓樂丘在焉曾元樂正子春之徒相與襄事勿使有悔焉者莽新始亂子姓南徙祠墓丘墟久矣富民毀滅遺址良可嘆也然石碣出而神道存魚人啟之馬鬣封焉道體不終泯沒實天意厚培聖賢也豈徒然哉

譜稱曾參南武城人自曾申而下歷漢唐宋若無聞者有稱參之後如惠恕啟之類是也舊有曾廟於南

武山陽成化初嘉祥學諭丘弘因吊於此山山多石勒皆曾子事如封謚廟庭書院塋墟與夫祭田四至靡不備悉乃進鄉人而言曰此曾子故處何可湮沒後有承其祀者必復其家廟云頃之側有富室范氏田多在此因謀竊碎其碑沉掩火化務滅其跡鄉人不以為意也後邑庠生王洲痛先賢泯沒慨曾祀無存乃以其事

上聞時命京三堂與本省三司勘驗范氏多方買證其事轉以本生為誣嗚呼先賢任道功被萬世而乃值變至此彼當事者果何心哉舊傳有書院在南武山

東為曾子讀書處據元時吳氏墓碑有東至曾子書院之文則知曾子墓在南武山之西南玄寨山之東麓歷有明據但世遠嫡湮眇不知處成化中山脚夫水鄉人捕魚陷一深穴中有懸棺得石碣上刻曾參墓三字遂及之官聞於朝乃承

命封土為丘中建饗堂前築神路旁樹松柏周圍繞以赤垣樹石坊扁宗聖墓儼乎巨室之佳城也范氏子孫寢以微滅天道何昭昭哉

來燕侯曾皙墓曾子父母合葬於費縣西南成山唐章懷太子曰南成山曾子父墓處

耘瓜臺在今南武山東嶺山之西南北相望有二馬

石蝦蟆如伏虎今見在太學生吳崇儒家鄉人相傳以

為魯氏舊物未知是否想亦在先塋中蒼麟白羊之類耳好古之士亦所欲聞故并記之

舞雩臺魯祭天禱雨之處曾點風乎舞雩樊遲從遊于舞雩之下是也在曲阜邑東南二里

孟子墓

叙曰孟子去齊老於鄒或謂齊王害之非也四基山麓窆實在焉郭璞所謂陽山北有四基即孟子葬隴是也蓋生鍾鄒嶧之奇沒窆四基之勝氣聚山靈奄藏萬世天之厚終聖賢固如此雖然教萬世者孟子也教孟子者賢母也馬鞍之陽母墓伊邇昔孟子親營窆窆母使士親膚者千古幽靈其與母常相依乎

鄒縣東三十里四基山前有亞聖孟子墓歲久不祀宋兗州守孔道輔始訪為立廟今改為墓祠

宋孫弼孟子墓碑記畧曰公之卒也葬於四基山之陽郭璞云邾城東南有嶧山嶧山北有牙山牙山北有唐口山唐口北有陽山陽山北有孟軻塚在焉今四基山是也景祐五年置廟於旁取門人高弟配焉子孫奕世居多近其所歲時奉祭家廟元豐六年曾孝寬言於朝遂特加鄒國公七年詔賜庫錢三十萬增修其祠象服九章樂正子配享公孫丑萬章俱侍左右給賜田以嚴洒掃詢其祖派得孟寧孟堅等十

數家皆其裔也

邾國公墓

邾國公宣獻夫人墓孟子自齊反魯葬於馬鞍山麓距

鄒十里許與父墓同葬云

元貞元年三氏教授張頌撰孟母墓碑記曰孟子自齊葬於魯蓋母喪也其地在鄒縣北廿五里馬鞍山之陽千六百餘年宜有豐碑記載而茂之或聞豈歷世既久遂湮沒耶惟片石在旁題曰鄒公墳廟碑僅存於母之德或畧鄒縣尹東陽司居敬完孟子廟宇復故宅葺墓廬亦各紀其事矣而謂孟子後孔子三十五年生時周定王三十七年謹按孔子以周敬王四十四年生時周定王三十七年實貞定王二十五年丙申孟子之至魏顯王三十三年也歲在乙酉逆數至貞定丙申為一百十年其生不在孔子卒後三十五年明矣蓋自孔子卒至孟子游梁時方百四十年而孟子已老則孟子之生去聖人未百年也其

莖魯也實為齊鄉時所以校然而盡於心者報母氏
劬勞亦至矣夫以聖賢之質在傳不動處師不煩固
有不待教而能者考之劉向列女傳孟母之教歷歷
可紀墓而築埋市而賈衡其居使之舍學宮之旁則
設俎豆乃性然也以有知而教信示機織以勸學循
曰童子之教耳子行子義吾行吾禮之言實在齊時
孟子老矣而母訓益嚴謂教之致非邪乃為之銘曰
粵若孟母爰適魯族篤生大賢喪父以夙聖道有傳
係母之儀乃徒其居乃斷其織譬彼桐梓拱把孰培
來莖自齊居鄉之位不儉其親有木以美
馬鬣斯封隆然其岡千六百年山高水長

諸賢墓

附孟子門人

叙曰孔氏門人生為高弟死侑廟堂其壙墓之間厚
終於聖賢孝子慈孫所自盡其心者世遠簾移荼蕪
湮沒多矣余以為人逝而道存骨朽而言立封土祀
之所以發潛德光泉壤也故紀傳有可考者類叙於
篇無者闕焉

閔子墓在濟南府城東門外五十里

齊乘

徐州蕭縣界閔子山下見有周孔門高弟

閔子墓一統志

冉伯牛墓初在汶上縣西門外感化橋側後遷於東平
州西十五里舊有碑刻本

朝墓前建祠塑像

兗州志

滕縣南三里亦有墓未知孰是

滕志

又伯牛阜在昌邑西北十里又東子騫阜古有閔子祠

今名三阜南有子游池並見寰宇記今日蓮花陂三

阜者蓋亦三賢之意但未詳所始見齊乘

大明一統志載有墓在河南孟津縣

仲弓墓在曹縣東北五十里俗呼冉垆兗州志

東昌府冠縣有仲弓墓一統志

宰我墓在曲阜舊縣西南二里兗州志

子貢墓舊傳在濰縣太伾山東南三里許今在太伾山

東麓

聞之余叔曰國初尋踏張家庄人慮將來官府祭謁之擾掘碑碣而匿其處官失於訪問誤祭

今墓若論其真當以舊傳為是新墓正德六年知縣胡惟良建祠有檢討穆孔暉記見濰縣志大伾東即本縣內

冉子墓在滕縣城南栢塚社

兗州志

魯有三冉仲弓伯牛之墓已各有處惟冉求無所考或此其墓云

仲由墓有三一在清豐縣西南三十里一在開州北一

十里一在長垣縣北三里孟子路嘗為蒲宰後死孔

悝之難蒲人葬之然三墓未知孰是

婁子靜曰西之長垣聞境內有子路塚北之開州見道旁有子路塚嘗聞陳宋土人亦云竟內有子路塚意疑塚云蓋開州在古為衛先賢所生之地長垣在古為蒲先賢所治之邑陳宋則絕糧慍見所也民之

秉彛好是懿德惟恐先賢遺跡不存于我邦故跡其疑者而為墓焉

子游墓在虞山上史記吳世家註與仲雍墓並列云

見蘇州志

子夏墓在山西平陽府河津縣西五里新封村前有碑題曰前代追封魏國公卜子夏之塋又芮城縣東十七里亦有子夏墓

河津古龍門縣也縣北僅五里有村曰新封乃子夏之故里舊有坟墓祠堂歷年既久兵燹弗存道旁北有碑一通題其額曰前代追封魏國公子夏之墓士夫過往者止於碑前瞻仰致敬而已 國朝弘治四年僉事胡公按部道出新封觀碑文慨然太息曰子夏乃聖門高弟今坟墓祠堂傾頽如此何以為祭奠之所乃命修之

又曹州西三十里有高阜見在里名卜堦都 兗州志

子張墓在徐州蕭縣南三十五里岨坊林西 一統志

澹臺滅明墓一在費縣東北三十里一在鄒縣西北三十里

正義曰子羽墓在兗州鄒城縣是也見兗州志一在澹臺湖旁或曰在吳縣西南八十里又俗

傳張士誠築城於虎丘土中得石刻曰澹臺滅明之墓未知孰是見蘇州志

宓子賤墓在壽州南六十里鐵佛岡舊有碑云子賤為

魯使吳死於道因葬焉 中都志

原憲墓在費縣西北一百二十五里俗呼原憲屯 兗州志

公冶長墓在諸城縣西四十里漢張華曰在城陽姑慎

城東南五里許墓極高 又山陽縣有公冶長墓寰宇記在密州西北五十里

高柴墓在沂州西南一百二十里一在陽穀縣未知孰是俱兗州志

司馬牛墓卒於魯郭門之外阮氏塋諸丘輿阮氏魯人也泰山南

城縣西北有輿城錄其卒塋所在愍賢者失所左傳據兗州志在費縣西南成山按杜預註南成縣哀公十四年司

馬牛葬此

陳子禽墓在河南太康縣北兗州志

公孫丑墓在鄒縣西北十里公孫社成化十九年縣尹張泰表其墓

萬章墓鄒縣城西南十里萬村坊郭社成化十九年張泰表其墓

左丘明墓在嶧縣東北七十里一在平陰縣東三十里

舊厲平陰今屬肥城二墓未知孰是

吳氏澄曰墓焉而體魄安廟焉而神魂聚人子孝其親者二端而已何也人之生也神與體合而其死也

神與體離以其離而二也故子於其可見而疑於無知者謹藏之而不忍見其亡於其不可見而疑於有知者勤求之而如或見其存藏之而不忍見其亡塋之道也求之而如或見其存祭之道也塋之日送形而往於墓塋之後迎精而反於家一旬之內五祭而不為數及其除喪而遷於廟一歲之內四祭而不敢既近代所謂祭者或隆於墓而畧於家夫伊川野祭古所深慨習俗之由来漸矣不有禮以稽其弊則雖豪傑之士亦且因仍而莫恠

孔廟

叙曰書稱格祖詩頌闕宮國家祖廟之設由來遠矣孔子以布衣立廟宗其聖德自哀公始廟藏衣冠琴履車書諸生習禮肅肅廟中太史公低回觀之不忍去蓋想見其人意何切也杏壇遺址木鐸希聲植檜重榮元神不死歷觀三五盛際七世之廟誰其媿隆者與其在於今祭用四月仲獻主宗子尊尊親親周道備矣駿奔於廟者覩几筵其尚如見夫子於故宫致孝享之誠心乎

孔子廟即孔子當時講道杏壇遺址魯哀公十七年因

夫子舊宅為廟置守陵廟百戶

史記云故所居堂弟子內後世因廟藏孔子衣冠琴履車書至於漢三百餘年不絕諸侯卿相至常先謁

然後

從政太史公曰余讀孔氏書想見其為人遠魯觀仲尼廟堂車服禮器諸生以時習禮其家余低回留之不能

去

水經注夫子宅大一項所居之堂後世以為廟廟屋三間藏孔子所乘車於廟中即顏路所請者也廟有

夫子像列二弟子執卷立侍漢魏以來廟列七碑二碑無字

漢鍾離意為魯相出私錢一萬三千付戶曹孔訢修夫

子車入廟拭几席劍履男子張伯除堂下草得璧七

救伯匿其一以六報白意意令主簿安置几前其堂

下床首有懸甕意召訢問答曰夫子甕也背有丹書

人莫敢發意曰夫子所以遺甕欲以垂示後人也因

發之得素書文曰後世修吾書董仲舒護吾車拭吾

履發吾笥會稽鍾離意壁有七張伯懷其一意召伯

問果服

後漢元祐二年魯相瑛置孔子廟卒史碑

歐陽永叔曰右漢魯相置孔子廟卒史碑云司徒臣雄司空臣戒稽首言褒成侯四時來祠事已即去廟

有禮器無常人掌領請置百戶卒史一人典主守廟制曰可按漢書元嘉元年吳雄為司徒趙戒為司空

即此云臣雄臣戒是也魯相瑛者據碑言姓乙字仲卿漢碑在者多磨滅此幸完可讀錄之以見漢祠

孔子其禮如此

後漢永壽二年魯相韓叔吉勅修孔子廟器碑

歐陽永叔曰古漢韓明府修孔子廟器碑云永壽二年青龍歲在君灘霜月之靈皇極之日永壽桓

帝年號也按爾雅云歲在申曰君灘桓帝永興三年正月戊申大赦改元永壽明年丙申曰歲在君灘是

矣霜月之靈皇極之日莫曉其義疑是九月五日前漢文章之盛庶幾三代之純深自建武以後頃爾哀

薄崔蔡之徒擅名當世然其筆力詞氣非出自然與夫楊馬之言醇醪異味矣霜月皇極是何等語

後漢建寧二年魯相晨請孔子廟饗公出酒脯穀等碑

仍置守廟百戶

歐陽永叔曰在漢魯相尚書章其畧曰建寧二年三月癸卯朔七日巳酉魯相臣晨長史臣謙頓首死罪

上尚書臣晨以元年到官行秋饗飲酒泮宮復禮孔子宅而無公出酒脯之祠臣輒依社稷出王家穀春

秋行禮建寧靈帝年號也於此見漢制天子之尊其辭稱頓首而不敢斥至尊因尚書以致達而已

魏文帝黃初二年詔魯郡修起舊廟置百戶史卒以守

衛之

陳王曹植孔子廟頌曰修復舊廟豐其薨宇莘莘學徒爰居爰處王教既備群小端阻魯道以興永作憲

矩洪聲登遐神祇來祐休徵雜沓瑞我邦家內先區域外被荒遐

唐太宗貞觀十一年修先聖廟給二十戶以充享祀

玄宗開元二十七年增新廟制

宋太宗太平興國八年謂近臣曰夫子廟堂未加營葺

闕孰甚焉乃詔大將作恢敞儒宮

真宗天禧五年詔以封禪行闕遺材椽樟榑梓之屬於

轉運司支係官錢修葺益加洪麗

仁宗慶曆四年三月勅於本縣中戶內差廟戶五戶
充本廟洒掃諸般祇應

神宗元豐元年十月詔兗州以省錢修葺祠廟
哲宗紹聖三年勅於係省錢內三千貫修本廟
高宗建炎二年金虜宗初為都元師至兗州以曲阜先
聖鍾靈之地禁軍士剽奪及登壇奠拜命知縣與縣
吏等防護聖林及聖跡猶存者

紹興十三年金熙宗二年於行省臺撥錢一萬四千貫
修聖殿委主簿監督禁官私侵占廟地著於令四年
再於行省撥錢一萬四千五百貫重葺廟殿

紹興三十一年金皇統大定間重建正殿廊廡大中門
大成門鄆國夫人殿明年又建伯魚子思殿奎文閣
丘山毓聖侯廟及廳堂黌舍門庫庖廚凡四百餘楹
歷四年乃成

光宗紹熙二年金章宗二年勅曲阜修孔子廟降錢八
萬三千貫有奇造樓殿廊廡等四百餘間仍設廟學
教授置下馬牌於廟門

元世祖至元丁卯成宗大德戊戌順帝至正己卯三次
童修

太宗九年令二十八戶民戶依舊看守孔廟

皇明洪武十年詔修宣聖廟二十年二十九年俱復增修

永樂十四年又撤其舊而新之

成化十八年六十一代孫孔弘泰請復修廣建正殿展

兩廡及門墻樓閣重新鼎建規制有加

弘治十二年廟災

朝廷特出帑藏銀十五萬修建十六年畢工

奏聞

勅遣大學士李東陽落成祭告因作重修廟序以叙始

末隆慶三年本府重修

大成殿

寢殿

泗水侯殿

沂國述聖公殿

東廡 西廡

杏壇亭

在先聖殿露臺前內有金党懷英篆杏壇二字
大字楊真東遊記曰壇之北世傳子路捨手
石蓋石之盤也夫所謂勇於義者豈若是而已哉

御贊碑

大成門

居仁由義毓粹觀德四門

奎文閣

貯古今圖籍公府屬典籍一人

李東陽賦畧曰偉新廟兮既宮突高閣兮麗空忽秋令兮始肅見奎星兮正中及輪奐兮鼎成藹冠裳兮咸萃翫美壻兮故宅誦典則兮遺經宛蝌蚪兮孔壁恍金絲兮曾聲感春秋兮絕筆憶詩禮兮趨庭存奇

文兮箱史脫
唐獻兮秦坑

大中門

石橋

德侔天地坊

道貫古今坊

櫺星門

太和元氣坊

金聲玉振坊

下馬牌

面牆石刻萬仞宮牆

楊奐至廟告祭曰嗟乎聖人造物也七十子造物之物也問仁者七而答之者七問孝者四而答之者四問政者九問君子者三答之者無一似焉不惟不違其所長而亦不強其所不能故大以成其大小以成其小造物奚間焉垂世立教百王所仰未有由之而不治舍之而不亂者也春秋諸國孰弱於魯降千八年而知有魯者吾聖人之力也吁生而不見用沒而賴之以聞何負於魯也後之有國有家者獨不思之與也

啟聖公殿

啟聖公夫人殿

毓聖侯殿

金絲堂

李東陽稱舊在孔廟左廡東嘗掘地得古刻知為孔子故宅世傳魯共王聞金石絲竹之

聲者新廟之闢金絲則移而西與詩禮堂正相直復為銘曰惟孔有宅曰惟聖門魯共何人欲壞更存維壁有書四代之文維堂有聲八音是聞昔堂在東今堂在西欲窺厥初視我銘詩

詩禮堂李東陽曰孔廟東有詩禮堂蓋舊名也今稍移而東數十步許因銘曰惟孔有庭聖訓攸在父立子過其徒是賴其訓維何維詩及禮手自剛定教自家始聖不可作庭名因存萬世是師矧惟子孫新廟既闢新堂亦遷有來繩繩世守勿愆

啟聖門 家廟

衍聖公齋居

與祭官齋居

燕門

闕里坊

五賢堂

今廢

楊奐東遊謁齊國公及魯國夫人之殿殿西而東向者五賢堂也謂孟也荀楊也王與韓也碑孔中丞道輔文中丞篤於信道於家法無愧矣

聖廟古蹟

各縣古蹟附

先聖廟在魯城西南隅去城二百步許東至舊曲阜縣二里餘即先聖舊居之宅實魯哀公所立也漢明帝東巡過魯幸先聖宅亦嘗御此命太子諸生說經於堂上後世遂以為殿漢唐以來雖更巨寇擾擾不敢暴犯如赤眉過魯亦解甲燒香再拜而去
宋天聖中知兗州四五代孫孔道輔監修祖廟增廣殿庭乃移大殿於後講堂舊基因甃為壇環植以杏魯人稱曰杏壇

開州刺史高德裔銘曰周室下衰王綱解紐非大聖人狂瀾莫救天挺夫子生民未有立言範世木舌金口三千之徒義由是受我瞻遺壇實為教首萬代護持天長地久

孔子手植檜三株在御贊殿前高六丈餘圍一丈四尺其紋左者左紐右者右紐一株在杏壇東南隅高五丈餘圍一丈三尺其枝盤曲如龍形世謂之再生檜
晉永嘉三年枯死隋煬寧元年復生唐乾封元年又枯死宋康定元年復生嘉定七年即金貞祐二年兵火災本廟延至本檜俄有五色雲覆其上中有群鶴翔鳴良久而去田夫野老無不見之

宋太常博士米芾贊曰煬東皇養白日御元氣昭道一動化機此檜植矯龍怪挺雄質二千年敵金石紉治亂如一昔百代下蔭奎壁
教授張頤曰闕里手植檜毀於甲戌之火根或戕之後八十年癸巳是為至元三十年導江張頤為教授

甲午春仲東廡頽趾壁隙間茁焉其芽躬徒復於故處矢之曰此檜復茂則孔氏日興明年春翠色葱然又明年丙申秋秩滿去喜矢言之有相也故為銘以識之銘曰茲檜之幹高參於天茲檜之根深及於泉是為手植自古有傳去聖伊何曰歲二千氣芳而達色殷而堅誰謂崑岡良玉以瘖誰謂斧折美茹以連嘉種載衍有芽其卷茁乎覽間東廡之偏乃徙故處全其天然孔氏以興矢言有焉粵若三禩葱蔥芊芊聖道以續聖澤以延肫肫其仁淵淵其淵自今以始於億萬年

五十三代孫孔涇祖檜記曰按祖檜前修記枯榮異常因有感焉蓋聖祖手植之檜歷周秦漢晉幾千歲至懷帝永嘉三年已已而枯枯三百有九年子孫守之不敢有毀至隋恭帝義寧元年丁丑復生生五十年一寔唐高宗乾封二年丁卯再枯枯三百七十有四年至宋仁宗康定元年庚辰榮至金宣宗貞祐二年甲戌伐惟於兵燹枝幹無遺後八十歲癸巳是為元世祖至元三十年故根重發至我皇明洪武二十二年已巳九九十七年其高三丈有奇圍僅四尺根本枝葉凌雲而盛紋理復左旋與故本

無異詳其理似有關於世道之理亂其始枯也晉兆五胡之亂其復生也有唐貞觀之治再枯於乾封丁卯武后竊政之兆與自後玄宗幸蜀亂亡相繼以及五代再宋於康定有宋三百餘年九儒之興罹於貞祐之火胡運將更發於至元癸巳七十五年中原文物兆開是為我太祖維新之治廟中古檜數多翠色參天惟此本異於尋常萬萬聖人手澤蓋有係於網常名教此覆斯文甄陶萬品豈惟宗枝之盛而已哉

廟栢先聖庭舊有栢二十四株歷漢晉大合抱有二株先倒折魯人莫敢犯宋文宗時江夏王義恭出鎮彭城悉遣伐之父老嘆息及義恭被害解體挑目睛以密漬之為鬼目粽時人以為伐栢之報也迄今廟庭松檜多而栢少

靈光殿在聖廟東二百餘步今遺址在荆叢中破瓦斷礎尚多漢景帝時魯共王好治宮室壞孔子舊宅以廣其宮聞金石絲竹之聲乃不敢發於壁中得古文尚書孝經論語等書此其地也

五父衢在廟東南一里許先聖殯母於衢即此

矍相圃在廟西南一百二十步周圍二里高一丈昔先聖與門人習射於圃即此晉太康志矍相圃在魯城內縣西南近孔子宅今圃中猶存舊井皆石為之其堂在廟東五里泗水帶其北洙水經其南皇覽云諸弟子房舍并井甃猶存先聖於此刪詩書定禮樂繫

周易作春秋魯訖所載孔子講堂者即此堂也

楊真記曰林東三里講堂也林與堂俱在洙北泗南硯臺井在其西惜去秋為水漫沒矣

歸德門在廟西南二百步魯城門世傳四方弟子慕聖德

而來學者多入此門魯人因以名之

闕里在廟南十里魯縣有二石闕曰闕里蓋里門也

後漢董憲裨將屯兵於魯侵害百姓光武拜鮑永為魯郡太守永到大破之惟別將彭豐不肯下頃之孔子闕里無故荆棘自除從講堂至里門永異之謂魯相令及府丞曰方今危急而闕里自開豈夫子欲太守行禮助吾誅無道邪乃命人衆修鄉射之禮請豐等共會觀視致因此擒之豐等亦欲圖永乃持牛酒勞饗而潛挾兵器永格殺豐在今縣聖廟之東

兩觀在魯宮城雉門之外周圍各四十步高一丈一尺

東西相去一百步杜預注雉門公宮之南門兩觀闕也昔先聖為司寇

誅少正卯於兩觀之下者是也今有兩觀石刻

楊真東遊入望兩觀穿然曰以少正卯之姦雄而七日之頃談笑剔去則知舜刑四凶使天下翕然服之明矣孰謂聖人而有兩心哉

端門在孔廟東南孔子將沒謂子貢曰端門當有赤書

周姬亡彗東出秦人滅胡亥按書既散孔不滅子貢以告往觀之化為赤鳥飛去按此語近誣姑記傳疑

巨井在曲阜縣東三里圍五丈三尺深八十丈皆石鑿

之相傳季桓子穿井得缶中若羊問先聖者此也

曬書臺在泗水縣東南五十里聖公山上相傳孔子晒書于此

夫子堂在魚臺縣穀亭鎮西二里孔子適陳寓此築室與群弟子講道今廢址尚存

問津亭 在魚臺縣樂游里之西

教書堂 在平陰縣南三十里紫蓋山上相傳孔子嘗教書於此因名孔子山

傾蓋亭 在郟城縣北十里孔子遇程子傾蓋而語即此

阿谷車轍 在定陶縣鬃山之谷處女阿谷之隧浣者也世傳子貢與言女子薛峻孔子稱其知禮

獲麟臺 在鉅野縣東南麟塚尚存唐常表微銘曰聖道堙鬱人心不開上無文武下有定哀吁嗟麟兮孰為來哉世治則麟世亂則麀此非其時麀鹿同群孔不自聖麟不自神吁嗟麟兮夫復何云

尼山 附

尼山書院在今孔子廟東南六十里宣聖誕育之處建

立時代無考宋慶曆癸未四十六代孫孔宗愿重建

洪武十年孔希學永樂十五年孔克忠相繼重修

正殿 寢殿 東廡 西廡

鄒縣令司居敬撰尼山記設像事神非古也其尸禮既廢之後乎漢文翁立學宮成都蜀有文翁石室

孔子危坐像其坐欵蹠向後屈膝當前上古君臣及七十二弟子繪事兩旁晉王右軍嘗簡蜀守寫倣之

有宋嘉祐中王公素摹為禮殿圖此像之最古者然皆漢衣冠也居敬學制鄒邑遷學舍於城西建孔子

廟時孔頽孟三氏子孫教授張頽習於禮者因問立像之制曰闕里行教像頽子從後者顧愷之筆杏壇

小影像具道子筆及近年司冠像皆漢晉衣冠耳儒行篇孔子自言少居魯衣逢掖長居宋冠章甫逢掖

深衣是已章甫玄冠是已於是做文翁石室作石像章甫逢掖危坐謂孔子毓秀尼山奉居坤靈洞既又

作子思像於中庸精舍孟子像於孟子墓廬以鄒魯聖人之居四方於此觀禮故刻之尼山以俟好禮者

取焉

聖父叔梁大夫廟 聖母顏氏夫人廟 毓聖侯廟

觀川亭

在居山上相傳以為子處今亭廢

坤靈洞

楊奐東遊記曰居山五峯隱隱在霄漢間而中峯迥出昔之所謂巧其頂者是也廢廢雖久而規模猶可見其西智源溪橋也正北中和壑也廢之西南觀川亭也瓦礫中得一斷石蓋前進士浮陽劉燁夾盧辨或曰夾驢劉惡其鄙俚故辨正之夾蘆峴在居山西由亭之東西旋而下得坤靈洞石角澌澌不可入族人云廟戶管用吉成嘗持火曳綆而入比至數丈忽隙有光觀一室口廣兩楹許中橫石牀石枕皆天成也而不可動以管與吉幼而瘡故可入也洞文劉燁之所刻也

顏母山

附

顏母山祠堂在孔廟東南六十里周圍十里高三里與居山對峙隔齊國公與顏氏夫人禱於居丘山嘗遊此而休息焉魏志亦言魯縣有顏母祠堂迄今尚存

聖井

在顏母山上

按顏母山者何以顏母稱蓋謂顏氏世居之山故聖王世居居丘之麓與顏氏同里開二族相距不二三里及啟聖王顏氏禱於居丘山而感生太聖顏母嘗憩息於此故以顏母名山云
孔公璜顏母山贊曰厥初顏氏飽天地春毓鍾至聖卓冠群倫有光前烈垂裕後昆惟木與水採本尋源井列寒泉廟開白雲
千秋萬禩永格明禋
楊奐東遊記曰因涉沂水過顏母山下觀文德林以草木障翳廟與聖井無所見

顏子廟

叙曰昔孔子以不遠復贊顏子後世謚為復聖徵其德也顏子故宅在古魯陋巷舊有亭亭中有井宋蘇軾嘗為銘之亭之北有廟歲久廟圯重修之自金明

昌始蓋昔賢游息故址遊神在焉生於此乎簞瓢沒
於此乎祠祀子孫歲修祀典神其依之與夫顏子德
與聖齊配享孔庭而又廟食於鄉雖百世可知也

顏子廟在孔廟東北六百舉步

漢禰衡顏子腐碑云稟天地之純和鍾岳瀆之休靈
德行邁於三千仁風橫於萬國名為四友之冠寔盡
疏附之益爾乃安陋巷挹清流甘簞瓢以克飢雖屢
空而不憂於時河不出圖周祚未訖仲尼無舜禹之
功先生包元愷之烈其詞曰亞聖德躡高蹤遊洙泗
肅禮容備懿體心彌冲秀不寔振芳風配聖饋圖辟
雍紀德行
昭岡窮

宋熙寧間重建金明昌五年重修歲久亭廢元元貞間
宣聖五十三代孫衍聖公治命顏族復構亭於故基

繚以重垣植桃李於中三氏子孫教授張頴礪石刊
復聖克國公像於亭中四匝有地廣袤各五十九尋
有五尺園亭古檜十有四株孤高五丈許

延祐四年七月南臺段傑建言重修泰定三年買地奉
勅勅建復聖克國公廟經始於泰定三年三月落成
於致和元年八月天曆二年十月都省移文續給鈔
米訖工冬十一月宣聖五十四代孫衍聖公思晦暨
曲阜縣尹孔思凱等顏氏五十五代孫族長秘會集
諸孫預行告禮自東廟遷聖像於新廟是日復聖克
國公誕辰也謹修祀事禮同時享

國朝洪武十五年五十七代孫顏池請官重修正統間
五十九代孫顏希仁聞於 朝重建成化十八年六
十一代孫顏公鉉奏請照孟廟戶數量撥洒掃戶看
守修理二十二年顏公鉉又請復修理規模宏敞內
顏樂亭退省堂延賓齋未完停工弘治十五年
勅命有司會計重修正德二年繼修

復聖公殿 寢殿 東廡 西廡 復聖門 櫺星門

御製碑亭 優入聖域坊 卓冠群賢坊

楊真告祭曰士君子之學原於治心聖門三千徒孰
非學也曰好之者獨公為然無事業見於當時無文
章見于后世考之傳記一再問而止察之日用一簞
瓢而止縣亘百世之下自天子達於庶人無敢擬議

者將從無
慾始乎

顏樂亭 顏井

司馬公曰孔子舊宅東北可百步有井魯人以為昔
顏氏之居也宗翰思其人構亭其上命曰顏樂邦直
為之銘其言顏子之志盡矣子瞻論韓子以在隱約
而平寬為哲人細事光謂韓子烏知顏子之所為哉
耶因子瞻之言申而盡之頌曰貧而無怨難顏子在
陋巷飲一瓢食一簞能固其守不戚而安此德之所
以完

宋學士東坡蘇氏有記畧曰顏子之故居所謂陋巷
者有井存焉膠西大守孔公宗翰始得其地浚治其
井作亭其上命之曰顏樂亭昔孔子以簞食瓢飲賢
哉稱顏子而韓子乃以為哲人之細事何哉蘇子曰
君子之於人也必於其小者觀之自其大者容有偽
焉人能碎千金之璧不能無失聲於破釜能搏猛虎
之暴不能無變色於蜂蠆孰知簞食瓢飲不改其樂
為哲人之大事乎乃作顏樂亭記以遺孔君正韓子

之說且以自警曰天之生民為之鼻口美者可爵芬者可黜美必有惡芬必有臭我無天遊六鑿交鬪騫而不反跬步商受美於我師安在微陋渺然其身中亦何有孟賁股票虎豹却走我求至樂千載無偶飄然從之忽

焉在後

程頤頤樂亭銘天之生民是為物則非學非師孰覺孰識聖賢之分古難其明有孔之遇有頤之生聖以道化賢以學行萬古心目破昏為醒茶治以闢升滌而深載基載落亭曰頤樂千載之上頤惟孔樂百世之下頤居孔作水不忍廢地不忍荒於乎正學其何可忘

杞國公殿

杞國公夫人殿

杞國公門

復聖公祠在寧陽縣西四十里頤氏子孫有居於此者前代因立廟以祀之仍復其家國朝如故

兗州志

曾子廟

叙曰禮稱不毀之廟宗有德也然吾道亦有宗焉仲尼祖堯舜曾子宗仲尼子思孟氏皆宗自曾子者自漢以降曾子配享孔廟其故鄉南武山之陽廟祀舊矣世遠嫡湮廟宇頹廢弔古者見山陽石勒乃嘆曰此曾子故處富室毀滅其跡可嘆也已未幾山麓穴中得石碣上刻曾子墓三字於是聞於

朝始封土焉建祠飾宇煥然重新天未喪斯文固宜廟食萬古奕奕如斯也其穴地琴堂石門隧道當時曾子弦歌之所富室壞之不可悉得而復矣惜哉

曾子廟在嘉祥縣萊蕪侯廟之西創始無所考

宋孝宗給洒掃二十戶

國朝正統甲子本縣儒學教諭溫良以邨國宗聖公廟

宇傾頹 奏修理之乃以正統乙丑秋興工明年丙

寅二月落成蓋因其舊而厝之也明年參議馬公諒

謁廟見神位合聚一室不無生瀆命於宗聖廟之西

躬建萊蕪侯廟東西兩廡獨置宗聖公同夫人像於

寢廟而曾西侍焉曾父曾母移之新廟中南向曾元

曾申位於兩廊東西向焉弘治間御史金洪見棟宇

傾圮 奏請於南武山陽度地計工委濟寧州督工

興造此屏南武山惇龐一帶南浥明水窪竒盡千疇

東拱耘瓜臺崩山獻秀西窆宗聖公墓玄寨來清誠
足以安神嚴祀增輝斯道

宗聖公殿 寢殿

東廡 西廡 戟門

御製碑亭 一貫傳心坊 三省自治坊

萊蕪侯殿 東廡 西廡 大門

嘉祥縣尹馬應龍武城考云南武城在今兗州之嘉
祥南武山東南三里許有遺址焉按孟子謂曾子居
武城史記曾參南武城人魯論謂子游為武城宰有
澹臺滅明者今縣南二里許有山與河俱名澹臺鄉
人相傳以為子羽所居云馬生曰今按武城有南北
北屬臨清隸濟南屬嘉祥隸魯今南武城與南武山
澹臺山俱澹臺河俱在此則知三賢之武城本南武
城而非北武城明矣今北武城亦啟子游祠奉祀是

徒泥邑之名而不察其實者也何者姑以滅明言之當唐宋時配享孔庭進爵為侯何近者不之封而特取於金鄉與是時南武久廢城屬金鄉故就而封之耳嘉祥重建起自金時即古南武也使其時已復是邑吾知亦不封金鄉而直以嘉祥封之矣且金鄉距北武水陸約七百餘里郡縣約七八餘城齊魯之不相淆風馬牛之不相及也若以隸濟之人而封魯受魯之封而祀齊則理之尤不通者也觀此則知滅明非北武城人子游非北武城宰明矣豈有出宰北武而得人至南武者哉費庠生姚庭槐曾子南武城考司馬遷史記於魯參下著南武城人於澹臺城明下著武城人而缺一南字後人因岐為二邑遂致武城之說紛紛不明遷著參之為南武城人也以漢時左馮翊有西武城清河郡有武城故也加以南字所以別此二邑也加南於魯而不加南於澹臺者蒙上言之耳孟子曰曾子居武城仁山金氏引曾子雜篇云魯人攻費曾子謂費君曰請出避姑無使拘承入吾宅又唐章懷太子註王符論曾子築父南成山云南成在今費縣西南又戰國策其茂之言曰曾子居費之武城即此信史類

則曾子費人無疑馮翊清河嘉祥之武城俱謬余嘗過武城之墟有詩以辨之云千載誰知南武城誤人遷史兩為名澹臺固可祠裡祀魯氏如何塚釋畊父老當今傳考據章懷後漢註分明他年表白幽芳日其茂仁山語息爭

琴堂

在今縣城東北崩山之麓

初時穴地一丈餘皆大石鋪甃四面宏濶約二楹許上員下方制如亭狀向南有石門昭穆開闢又南有隧道九級而下入其中者冬溫夏爽心恬神怡樂而忘倦考創制之由不知何時但正北面上刻篆文云重建琴堂記大金太和七年正月上元日云末鐫蘇思忠立四字鄉人相傳以為昔曾子嘗弦歌於此後人因作堂以識之或曰乃子游弦歌處也歷元入

國朝嘉靖九年尚無恙弔古之士孰不欣覩而願見之不意縣令王時佐因思愛禮存羊之意徑將先賢遺跡因修津橋缺石肆意毀之致使數千年勝槩一旦滅其踪君子恨之

鄒城縣有曾子祠在縣治磨山兗州志

孟子廟

叙曰孟子養氣抱道崇正拒邪屹立縱橫之世天下
一人而已余悲太史公列與荀卿同傳何其淺也夫
禦災捍害祭法祀之禮也孟子捍禦戰國以閑聖道
功齊三聖而力倍之崇祀於鄉豈虛也哉其斷機堂
暴書臺遺址猶存毋訓師教玉成亞聖全德君子觀
於此可想見聖學之源矣

孟子廟舊在鄒縣東北三十里四基山之麓

宋景祐四年宣聖四十五代孫孔道輔守兗州求亞聖

墓於此山得之始建廟立碑元豐六年吏部尚書魯
孝寬言孟軻有廟在鄒未加封爵詔封鄒國公後徙
縣東郭宣和初縣令朱岳將廟復置於今城南門外
里許通衢東舊廟改為墓祠

國朝景泰六年設門子四戶看守孟廟及賜田給佃戶
十戶成化六年撥佃戶七戶以備看守十八年復賜
二十五戶以充洒掃弘治丙辰奏請復修規制宏
麗

亞聖公殿

寢殿

東廡

西廡

櫺星門

繼往聖坊

開來學坊

宋泰山孫復記孔子既沒千古之下駕邪恠之說肆
奇險之行侵軼我聖人之道者衆矣而楊墨為之魁
故其罪劇孔子既沒千古之下攘邪恠之說夷奇險
之行夾輔我聖人之道者多矣而孟子為之首故其
功鉅昔者二豎去孔子之世未百年也以無父無君
之教行於天下惑而歸之孟子慨然奮起大陳堯舜
禹湯文武周公孔子之法驅除之以絕其後拔天下
之民於夷狄之中而復置之中國俾我聖人之道炳
焉而不墜故楊子雲有曰古者楊墨塞路孟子辯而
闢之廓如也韓退之有曰孟子之功不在禹下然子
雲述孟子之功不若退之之言深且至也何哉泮水
橫流大禹不作則天下之民魚鱉矣楊墨暴行孟子
不作則天下之民禽獸矣謂諸此也

楊真東遊入廣告鄒國公曰子之於聖人其猶天而
地之日而月之與學出於詩書道兼乎仁義至於知
易而不言易知中庸而不言中庸此又人之所難能
也湯武則待子而義匡章則待子而孝紛紛楊墨之
徒待子而後黜其為功
鴻且著矣豈好辨哉

邾國公殿

邾國公夫人殿

啟賢門

鍾靈門

致嚴堂

陳繹曾記謂廟貌雖崇齋宿之室賓尸之堂
闕焉未建非所以嚴思誠而尊神蠲也于是

為燕堂以尊神蠲為齋室以嚴思誠名其堂曰致嚴
傳曰祭則致其嚴古之君子令終而致其嚴者不過
五宗子姓而已今鄒人致嚴於孟子大夫庶士咸
在非特群昭群穆也明德之祠百世稱章盛矣哉

暴書臺在鄒故庠少西崇二丈許名曰暴書臺下即孟

子居也元鄒縣尹司公立碣書名於其上

鄒縣令張銓記沂國述聖公昔居鄒教孟子曾暴書
於此其臺下即孟子居也元貞間縣尹司公創祠與
學立石大揭其名至順二年司公立者仆且斷鄉士
大夫僉曰宜復其舊乃求石摹辛泉楊公故書立之
於乎古今一天也聖賢一心也登
是臺者雖千百年又豈非一日也

孟母斷機祠在鄒縣城東南隅暴書臺西東去子思書

院僅百步永樂宣德中知縣朱瑤房岳縣丞宋融相

繼重修

天順五年寧陽許彬記畧曰予惟天下古今稱母道之賢能成其子之志者不曰陶母柳母則曰孟母然陶母剪髮延賓柳母丸膽教子固善矣而其子之成不過躋顯位而已豈若孟母斷機飭厲其子卒傳道統有功於天下後世也觀其距楊墨闢異端開先聖之道功不在禹下先正論之曰禹之功不過救民之生孟子乃能正民之心苟心有不正雖生何益哉此孟子之所以有功於天下後世也

孟母斷機圖

洪武四年進士吳能敬題曰傳稱三遷之教人矣今觀是圖益信母之賢也子之聖由母而成母之賢由子而著此七篇之書所以繼往開來實由母之一喻啟之也豈後日之伏劍剪髮者可同日語耶

孟母廟一在陽穀縣城北四十里安樂鎮西世傳孟母

祈蚕之所金天眷三年知縣楊用道重建 兗州志

諸賢廟

叙曰古之君子秩祀於鄉所以表先達發幽光樹標準為世勸也孔子沒弟子分散諸國或為卿相或為師傳或隱草澤其考終命一也老成典刑表率鄉閭景仰模範義同尸祝思而祀之禮則然也高山流水崇賢報德不可以風百世乎故考其紀傳有聞者錄於左無者闕焉

閔子祠在濟南府城東五十里

按歷城之東五里有丘焉曰閔子之墓墳而不廟

宋熙寧七年濟南太守李肅建為祠堂蘇子由作碑記

東坡書

濰州昌邑西北子騫阜上古亦有廟

徐州蕭縣有閔子祠

冉子祠在東平州城西十五里春秋祭祀即伯牛墓所

仲弓廟在曹州冉堦集弘治間知縣鄒魯建即墓所

子貢祠在大名府濬縣鄉賢祠又在本縣太伾山東正

德十六年知縣胡惟良建祠檢討穆孔暉記即墓所

畧曰黎陽古衛地唐開元間追爵子貢為黎侯宋加封黎陽公后改封黎公至今濬有古墓又相傳為黎公墓云子貢親領一貫之傳嘗論性與天道其所造自顏曾而下蓋淵矣史記乃載之貨殖傳者稱其耻

原憲之貧乃誇其存魯亂齊破吳強晉伯越之事鄙哉遷之見也既達一貫性命之旨其去無誦無驕之年已遠矣尚不知貧非病之大義哉貨殖傳是以其少時曾為者蓋其終身也至其所謂存魯亂齊破吳強晉霸越之事蘇子由以為戰國說客為之辭子由蓋得之矣

冉有祠在汶上縣南感化橋下宋劉伶移建汶陽之高

原嘉靖元年建祠

子游祠在常熟縣東北一里

朱晦翁記吳公祠畧曰句吳在虞夏五服為要荒之外自泰伯采藥荆蛮端委以臨之然亦僅沒其身而虞仲之後相傳累世乃能自通于上國其俗蓋亦朴鄙而不文矣公能悅周公仲臣之道北學中國身通受業遂因文季得聖人之一體豈不可為豪傑之士哉今以論語考其語言類皆簡易踈通高暢宏達其日本之則無雖右見詘于子貢然要為知有本也其所謂文季固異乎今之文季矣考其行事則武城之

政不小其邑而必以詩書禮樂為務視其勇足民之效蓋有不足為者及其取人又以二事之細而得咸明之賢意其為人心當敏于聞道而不滯于形器豈所謂南方之季得其精華者乃自古而已然也耶

學道書院為吳公言偃立

陳宜中為之記

畧曰昔者夫子講道齊魯之郊從遊多北方之士由向吳登聖門者獨吳

公子游一人今常熟其故里也故有祠紫陽先生嘗記之矣余按公以文季列四科嘉言善行可傳者不一獨以二語乃親得於聖人而見於用復以印可於聖人者道在天地終古常新何昔能為天下公而今幾為君子隱耶此余所以慨然正季絕續之際想孩歌之聲而不可得聞猶幸登斯堂者能有感於命名之義人心未喪斯文或因之而興起也與

嘉靖二年知府胡纘宗乃以景德廢寺改建書院其前門扁曰東南鄒魯後有樓曰弦歌樓公每課士頻蒞

此地 蘇州府志

言偃宅在常熟縣西今稱言公巷吳地記云宅有井井邊有洗衣石皆故物輿地志云石為太守蕭正德持去

廢 兖州志

兖州府嘉祥縣有子游祠在縣南四十五里崩山西今費縣有子游祠在縣西北七十里武城東闕陽川嘉靖二十五總漕御史周用檄建

子夏祠在山西平陽府河津縣西北辛封里墓之前有寺弘治十七年御史謝朝宣至其墓言邪不可干正

遂毀佛像易賢像題其額曰魏國公卜子夏之祠
正德七年副使吳江至縣有賢裔訟鄰人侵墓地遂
處以罪仍命有司建外門三楹中門一楹東西廡共
六楹正堂仍舊

澹臺滅明祠在曹縣東三十里龍須岡

一在費縣西南七里

論曰古者謚定而葬葬者藏也藏體魄也既葬而廟
廟者貌也肖像貌也孔子安於泗上廟即其故宫蓋
天造之地設之人成之魯人世世奉祀不絕德感故
也然魯故少昊有陵靈光有殿秦蕪瓦爍過者悲之

孔子位不及少昊富不擬共王而林廟奕然聳觀語
云盛德必百世祀正謂是矣三氏諸賢廟墓遺芳纍
纍不遂泯滅所謂附驥尾而名益彰者乎周豐曰墟
墓之間未施哀而哀宗廟之中未施敬而敬君子瞻
馬鬣覩几筵仰思先烈其如有見也夫其有所感也
夫

